

續後漢書

附義例
音義

四



書 漢 後 續

義音 例義附

(四)

撰 常 蕭

王雲五主編
叢書集成初編

續後漢書
附義例音義
四冊

中華民國二十五年六月初版

撰者 蕭 常

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

章

續後漢書卷第三十六

魏載記第三

荀彧

荀彧字文若。潁川潁陰人。祖淑。朗陵令。父緄。濟南相。時宦寺用事。中常侍唐衡者。尤桀黠。欲以女妻汝南傅公明。公明恥之不娶。因以妻彧。永漢元年。舉孝廉。爲守宮令。董卓之亂。求出補吏。除亢父令。棄官去。冀州牧同郡韓馥遣將迎之。彧至而袁紹已奪馥冀州。待彧以上賓之禮。初平二年。彧辭紹。從曹操于東郡。操與語大悅曰。吾子房也。以爲奮武司馬。興平初。擊陶謙。使守鄆城。任以留事。會張邈。陳宮以兖州歸呂布。諸城皆應之。彧勒兵設備。故能自保。又與程昱謀。使說范東阿。卒全三城。以待操。陶謙死。操欲取徐州。還乃定布。彧諫曰。昔高祖保關中。光武據河內。皆深固根本。以制天下。進可以勝敵。退可以堅守。故雖有困敗。而終濟大業。將軍本以兖州首事。故能平定山東。此實天下之要地。而將軍之關河也。若不先定之。則根本將何寄乎。宜急討陳宮。使不得西顧。約食蓄穀。一舉而布可破也。破布然後討袁術。以臨淮泗。今舍布而東。民心益危。雖鄆城。范。衛。可全。其餘非己之有。若攻徐州不克。將軍其安歸乎。操乃止。大收麥。復與布戰。布敗走。兖州平。建安元年。獻帝自河東還洛陽。或以韓暹。楊奉。新將天子到洛。未可卒制。彧勸操曰。昔高祖東伐。爲義帝縞素。而天下歸心。今車駕旋軫。義士有存本之思。百姓感舊而增哀誠。因此時。奉

主上以從民望。大順也。秉至公以服雄杰。大略也。扶宏義以致英俊。大德也。四方雖有逆節。其何能爲。韓暹、楊奉安足恤哉。若不時定。使豪杰生心。後雖欲爲無及矣。操從之。及帝都許。操爲車騎將軍。彧爲漢侍中。守尙書令。操每攻戰在外。凡軍國事皆與彧籌焉。又進荀攸、鍾繇、郭嘉等爲操謀臣。袁紹旣并河朔。有驕氣。而操敗于張繡。紹與操書。其辭不假借。操謂彧曰。今欲討不服。而力不敵。何如。彧曰。今與公爭天下者。維袁紹耳。紹外寬內忌。公明達不拘。此度勝也。紹遲重少決。失在後機。公能斷大事。應變無方。此謀勝也。紹御軍法令不立。雖衆難用。公法令旣明。士卒致死。此武勝也。紹飾知以收名譽。公推誠不爲虛美。此德勝也。夫以四勝輔天子。扶義征伐。誰敢不從。紹雖強。其何能爲。操說乃說操先取呂布。而後攻紹。操從之。三年遂擒布。定徐州。五年紹帥衆攻操。操與相拒。紹兵勢甚盛。彧曰。紹兵雖多而不整。田豐剛而犯上。許攸貪而不治。審配專而無謀。逢紀果而自用。顏良、文醜匹夫之勇。可一戰而擒也。後皆如其策。操保官渡。紹圍之。操軍餉不繼。書與彧議還許。彧報曰。今軍食雖少。未若楚漢在滎陽。成臯間也。是時劉、項莫肯先退者。以爲先退則先屈。公盍其喉已半歲矣。情見勢竭。必將有變。此用奇之時。不可失也。操從之。以奇兵襲破紹。操欲南擊劉表。彧曰。今紹敗。其衆離心。不因而定之。而遠兵江漢。若紹收其餘燼。乘虛以出。則公之事去矣。操乃止。八年封萬歲亭侯。九年操拔鄴。自領冀州牧。或說操宜復置九州。冀部所統旣廣。天下服矣。操將從之。彧曰。若是則冀州當得河東、馮翊、扶風、西河、幽、并之地。所奪者衆。人心易動。一日生變。天下未易圖也。願公先定河北。然後脩復舊京。南臨荊州。責王貢之不入。天下咸知公意。人人自安。天下

大定乃議古制。操從其言。十二年。操將攻劉表。問計于彧曰。今兩河旣平。荆漢知亡矣。可聲出宛葉。而間行輕進。以掩其不意。操遂行。會表死。遂取荊州。十七年。董昭建議。欲進操國公。九錫備物。密以訪彧。彧曰。曹公本興義兵。以董正漢朝。雖勳庸榮著。猶秉忠貞之節。君子愛人以德。不宜如此。操由是不悅。會攻孫權。表彧勞軍于譙。因畱彧。以侍中參丞相軍事。操軍向須濡。彧病畱壽春。操饋之食。發視乃空器。于是飲藥而死。年五十。初。董承等受帝密旨。誅操事泄。操殺承等。伏后與父完書。言操殘逼之狀。帝方爲承等報怨。完以示彧。彧惡之。隱而不言。完妻弟樊普。封以示操。彧恐事覺。因勸操以女配帝。操曰。伏后在。吾女何得配上。彧曰。伏后往嘗與父書。惡言及公。可因此廢。操曰。卿昔何不言。彧佯驚曰。已嘗爲公言之。操曰。此豈小事。而吾忘之耶。以此憾之。而外示優容。及董昭九錫之議。彧意不同。積前憤殺之。然弑后之謀。實自彧發。

董昭

董昭字公仁。濟陰定陶人。袁紹以爲魏郡太守。背紹歸張楊。楊以爲騎都尉。復彌縫楊奉等。使共迎曹操。操爲鎮東將軍。昭爲符節令。又爲操畫策。挾天子以令諸侯。且使請車駕幸許。累遷魏郡太守。操定鄴。除諫議大夫。從操征烏丸。操患糧餉不繼。乃建議鑿平虜。泉州二渠。以通海運。操表封千秋亭侯。轉司空。祭酒。日夜爲操謀。所以代漢。曹丕篡漢。遷大鴻臚。轉侍中。封都鄉侯。遷太僕。曹叡初。進封樂平。遷衛尉。拜司徒卒。年八十一。

華歆

華歆字子魚。平原高唐人。舉孝廉爲郎。以病去官。何進輔政。召爲尙書郎。董卓遷帝長安。歆求爲下邳令。不許。遂抵南陽。從袁術于穰。會太傅馬日磾。安集關東。辟爲掾。詔拜豫章太守。爲政不煩。孫策略地江東。遣太史慈招撫劉繇餘衆。因使察歆所爲。慈語策曰。子魚非籌略士。無他方規。自守而已。無能爲也。又丹陽僮芝據廬陵。鄱陽民帥別立宗部。不受子魚所遣長吏。言我已別立郡。須漢遣真太守來。當迎之耳。子魚不惟不能諧附廬陵。鄱陽。近自海昏。有上繚壁五六千家。相結作宗伍。調遣一人。亦不可得。惟坐視之。策遂有并兼之志。及策兵次椒丘。歆迎降。曹操在官渡。表天子徵歆。權不卽遣。歆請曰。將軍始奉王命。今匪僕。是養無用之物。非良計也。權乃遣之。既至。拜議郎。參軍事。入爲尙書。代荀彧爲尙書令。先是。伏后與父完書。言操殘逼之狀。至十九年。操始知。偁帝廢后。帝不許。操遣歆與御史大夫郗慮勒兵入宮。收后。后閉戶匿壁中。歆壞戶發壁。手牽后出。后被髮徒跣。執帝手曰。不能復相活耶。帝曰。吾亦不知命在何時。顧謂慮。郗公。天下寧有是事邪。遂弑后。并弑二皇子。丕爲魏王。以歆爲相國。及篡漢。改司徒。封安樂鄉侯。曹叡初。進封博平。轉太尉。建興九年卒。

郗慮

郗慮字鳴豫。山陽高平人。荀彧薦之於操。操以爲御史大夫。操常疾孔融。有時譽。慮希操旨。奏免融官。復誣以非而族之。其陰險禍賊類如此。

贊曰。唐人杜牧。稱彧勸操取兗州。則比之高光。官渡之役。則比之楚漢。及事已就。乃欲要名于漢氏。譬之教盜穴牆發篋。而不與同挈。不謂之盜可乎。世皆以牧之言爲確論。而范曄謂彧有殺身成仁之義。近世司馬光。亦以其功過管仲。且以仁許之。曄不足道也。而光亦爲之。雖然。彧之罪終不以二人之言而少掩。夫人苟犯天下大義。雖顏孟爲之辭。世且不直之。況曄輩乎。華歆。鄒慮。以名德自居。梟獍其行。前史無一言譏其非者。吁。可怪哉。

荀攸

荀攸字公達。彧從子也。何進秉政。召海內名士。攸至。拜黃門侍郎。董卓之亂。攸與議郎鄭泰。何容。侍中种輯。越騎校尉伍瓊等。謀殺卓。事垂就而卓覺。以容。攸。繫獄。容自殺。攸言語飲食自若。會卓死得免。曹操以天子都許。召爲尙書。與語大悅。謂荀彧。鍾繇曰。公達非常人也。吾得與之計事。天下何憂哉。以爲軍師。建安三年。從操攻張繡。攸曰。繡與劉表相恃爲強。然繡以游軍仰食于表。表不能供也。勢必離。不如緩以待之。可誘而致也。若急之。其勢必相救援。不從。表果救之。軍敗于穰。操曰。不用君言至此。操攻呂布于下邳。布固守。操軍欲還。攸與郭嘉說曰。布勇而無謀。三戰皆北。其銳氣衰矣。三軍以將爲主。衰則軍無奮意。陳宮有智而遲。今及布氣之未復。宮之計未定。急攻之。可拔也。乃引沂。泗。灌城。城潰。禽布。袁紹遣郭圖等攻東郡太守劉延于白馬。紹引至黎陽。操救延。循河而西。紹渡河追操至延津。操與紹將文醜戰。敗之。皆攸計也。操與紹相持官渡。攸謂操曰。紹運車且至。其將韓。莫。銳而輕敵。擊可破也。操問誰可使者。攸曰。徐晃。

乃遣晃及史渙要擊破之。會紹許攸叛紹來奔。言紹遣淳于瓊等將兵迎運糧。可擊而取。衆皆疑。惟攸與賈詡贊其計。操自往破之。斬瓊等。紹以故敗。操欲攻劉表。而紹子譚尙爭冀州。譚遣辛毘求救。操將許之。其屬皆以表爲強。宜先表而後譚。攸曰。天下方有事。而劉表坐保江漢之間。其無四方之志可知矣。袁氏據四州之地。帶甲十萬。今兄弟交惡。勢不兩全。若有所并。則力專。力專則難圖。及其亂而取之。天下定矣。此時不可失也。操乃許譚。和遂破。尙其後復斬譚於南皮。冀州平。操表封陵樹亭侯。轉中軍師。操稱魏王。爲尙書令。操每稱之曰。公達外愚內知。外怯內勇。外弱內強。不伐善。無施勞。知可及。愚不可及。雖顏子甯武不能過也。與鍾繇善。繇言。我每有所行。反復思之。自謂無以易。以咨公達。輒復過人意。從攻孫權。道病卒。

賈詡

賈詡字文和。武威姑臧人。董卓入洛陽。詡以太尉掾遷討虜校尉。卓壻牛輔屯陝。詡在輔軍。卓敗。輔亦死。其黨李傕、郭汜等散兵間行歸鄉里。詡曰。聞長安中欲盡誅涼州人。而諸君棄衆單行。卽一亭長能束君矣。不如率衆西向長安。爲董公報仇。衆以爲然。惟等旣陷長安。殺王允等。乘輿蒙塵。公卿戮辱。民庶死者十八九。而曹操等階之竊國。皆自詡一言始。時論其惡。又甚于卓。詡爲左馮翊。惟等欲侯之。詡曰。此救命之計。何功之有。固辭。又以爲尙書僕射。翊曰。僕射官之師長。翊名不素重。非所以服人也。縱詡昧于榮利。奈國朝何。惟復以詡爲宣義將軍。惟旣敗。復從張繡。爲繡畫計。歸曹操。操以爲執金吾。封都亭侯。參司空。

軍事建安十三年操既得荊州欲順流攻吳詡曰明公威名遠著若乘舊楚之饒撫百姓使安土樂業江東可不勞衆而服操不從軍大敗時子丕爲五官將而操屬意于中子植嘗屏人問詡詡不對操曰與卿言而不答何也曰有所思耳操曰何思曰思袁本初劉景升父子也操笑曰止丕篡漢卽拜太尉封魏壽鄉侯孫權聞而笑曰魏雖乏人何至用是人年七十七卒許攸者字子遠旣叛紹歸操與詡及荀攸等皆爲操謀臣然恃功驕慢嘗于廣坐呼操小字曰阿瞞汝非我那得冀州操曰汝言是也然內不樂竟陰使人殺之又有一國淵者樂安人字子尼挾數任術操辟爲司空掾累遷魏郡太守時有投謗書操憤之必欲得其主名淵請畱其本書而不宣露其書多引二京賦淵刺功曹得三人臨遣訓以所學未及二京賦曰此博物之書也世人忽略少有其師可求能讀者從受之又密諭旨旬日得能讀者遂往受業吏因請作箋比方其書與所投者正同攝問具服其譎險類此

程昱

程昱字仲德東郡東阿人長八尺三寸美鬚髯曹操至兗州與語悅之以爲壽張令操攻徐州使與荀彧畱守鄆城張邈等迎呂布郡縣響應惟鄆城范東阿不動布軍降者言陳宮欲自將兵取東阿又使汎嶷取范吏民皆恐或謂昱今兗州唯有此三城宮等以重兵臨之非有以深結其心三城必動君民之望歸而說之昱乃過范說其令靳允曰聞呂布執君之母弟妻子孝子誠不可爲心今天下大亂豪杰竝起必有命世能息天下之亂者此知者所詳擇也呂布麤中少親剛而無禮匹夫之雄耳宮等以勢假合不能

相君也。兵雖衆必無成。曹使君知略不世出。君若固范。我守東阿。則田單之功可立也。允曰。不敢有二。時汎嶷已在縣。允卽伏兵殺之。歸勒兵守。昱又別遣騎絕倉亭津。宮至不得渡。東阿令棗祗亦帥吏民堅守。卒完三城以待。操還執其手曰。微子吾無歸路矣。乃表爲東平相。屯范。時操與布戰于濮陽。數不利。又蝗蟲起。乃各引去。操欲與紹連和。紹欲使操遣家居鄴。操新失兗州。軍食且盡。將許之。昱適還曰。昱聞將軍欲遣家與袁紹連和。有之乎。願將軍更慮之。操乃止。天子都許。以昱爲尙書令。操攻荊州。昭烈如吳。論者以孫權必害昭烈。昱曰。劉玄德有英名。關羽張飛皆萬人敵。權必資之以禦我。難解勢分。不可得殺也。權果多與昭烈兵以禦操。其後中夏漸平。操撫昱背曰。兗州之敗。不用君言。吾何以至此。宗人奉牛酒大會。昱曰。知足不辱。吾可退矣。乃闔門不出。操稱魏王。以爲衛尉。與中尉邢貞爭威儀。免。子丕篡漢。復爲衛尉。封安鄉侯。方欲以爲公會卒。時年八十。初操乏食。昱略其本縣供三日糧。雜以人脯。由是大失素譽。

郭嘉

郭嘉字奉孝。潁川陽翟人。荀彧薦之于操。操與論天下事曰。使孤成大業者。必此人也。表爲司空軍祭酒。與昱齊名。攻呂布。三戰破之。布退固守。時士卒敝疲。操欲引還。嘉說操急攻之。遂擒布。比操破袁譚。尙皆其計也。封洧陽亭侯。又說操攻袁熙。及三郡烏丸。皆大破之。斬蹋頓名王以下。尙及兄熙。走遼東。死。嘉有算略。達于事情。操常曰。惟奉孝爲能知孤意。還自柳城卒。時年三十八。後操攻荊州。還巴丘。旣大敗而軍疾疫。歎曰。奉孝在不使孤至此。

劉曄

劉曄字子揚。淮南成德人。光武子。阜陵王延之後也。許劭名知人。嘗稱其佐世之才。曹操辟爲司空倉曹掾。操攻張魯。至漢中山峻難登。軍食頗乏。卽日引歸。令曄督諸軍。使以次出。曄策魯可克。馳白操。不如進攻。操從之。魯走。漢中遂平。曄進曰。明公今舉漢中。蜀人望風破膽。可傳檄而定。劉玄德人杰。有度而思遲。得蜀日淺。蜀人未附。以公之明。因而攻之。無不克也。若小緩之。諸葛亮明于治國。而爲相。關羽、張飛、勇冠三軍。而爲將。人心旣定。據險守固。則不可犯矣。今不取。後必爲患。操不從。居七日。益州降者。言蜀中一日數十驚。守將雖斬之。不能安也。操問曄曰。今可擊否。曰。今已小定。未可也。乃還。建安末。昭烈宜都太守孟達來奔。達容止可觀。丕器之。以爲新城太守。曄以達有苟得之志。而恃才任術。必不能感恩懷義。新城與吳漢接境。必爲國患。後果謀歸漢。章武二年。爲侍中。曹叡初。封東亭侯。遷大鴻臚。卒。子陶善縱橫。有才而薄于行。官至平原太守。

蔣濟

蔣濟字子通。楚國平阿人。爲州別駕。嘗以公事至譙。操謂曰。昔孤與袁本初對官渡。徙燕白馬。民不得走。賊亦不得鈔。今欲徙淮南民何如。濟曰。是時兵弱敵強。不徙必失之。今百姓樂土。實不願徙。懼必不安。操不從。而江淮十餘萬衆。皆驚走吳。後濟使鄴。操迎笑曰。本使避賊。乃更驅盡之。拜丹陽太守。操攻孫權還。以溫恢爲揚州刺史。濟爲別駕。辟丞相主簿。關羽圍樊。襄陽。操以獻帝在許。近敵。欲徙都洛。與司馬懿

說曰。關羽得志。孫權必不願也。可使人勸權躡其後。許割江南以封之。則樊圍自解。操如其言。權因襲殺羽。子丕篡漢。爲東中郎將。上萬幾論。丕善之。入爲散騎常侍。與曹仁南侵。仁欲攻濡須洲。濟曰。敵居西岸。列船上流。而兵入洲。是爲內地獄。危亡之道也。仁不從。果敗。仁卒。復爲東中郎將。代領其衆。召爲尙書。丕欲至廣陵。濟表水道難通。又上三洲論以諷。丕不從。戰船數千。皆滯不得行。議者欲畱兵屯田。濟以爲東近湖北臨淮。若水盛時。敵易爲寇。不可安屯。丕從之。丕還到精湖水稍盡。畱船付濟。濟更鑿地作四五道。蹴船令聚。預作土豚。遏斷湖水。皆引後船。一時湖水開。遏入淮中。丕謂濟曰。事不可曉。吾前決謂分半燒船于山陽池中。卿于後致之。略與吾俱。至譙。又每有所陳。實合吾意。自今討伐計畫。善思論之。曹叡初遷中護軍。加散騎常侍。曹芳嗣僞位。爲領軍將軍。封昌陵亭侯。遷太尉。初侍中高堂隆。以魏爲舜後。濟以爲舜本姓媯。其苗曰田。非曹氏之先。著文以詰難。曹爽之在伊南也。濟與書言司馬懿之意。不過免官而已。旣而懿夷爽族。進封都鄉侯。辭不許。常恨其言之失。發病卒。

贊曰。董卓國之賊。天下所共仇。而詡爲之報。東京之亡。禍根于此。及辭李傕尙書之命。則以朝廷爲解。是欲以虛辭蓋實惡。將誰欺耶。昱脯人肉。以啖操軍。此盜賊所不忍爲者。曄傾心曹氏。而忘其宗國。其昭歆之徒與。

續後漢書卷第三十七

魏載記第四

鍾繇

鍾繇字元常。潁川長社人。舉孝廉爲尙書郎。累遷黃門侍郎。獻帝在西京。李傕、郭汜亂長安。關東隔絕。操領兗州。遣使上書天子。傕、汜欲拒絕之。繇說傕、汜納其使。由是操使命得通。荀彧既數稱其才。聞其說。傕、汜操益虛心。天子得出長安。繇與尙書郎韓斌有力焉。後遷尙書僕射。封東武亭侯。是時關中諸將馬騰、韓遂各擁強兵。操方有事山東。以關中爲憂。乃表繇以侍中守司隸校尉。持節督關中諸軍。委以便宜。不拘常法。繇至。移書騰、遂等。爲陳禍福。騰、遂各遣子入侍。操在官渡。繇送馬二千匹給軍。操與書曰。關右平定。朝廷無西顧憂。公之勲也。昔蕭何鎮守關中。足食成軍。亦適當耳。其後匈奴攻平陽。繇帥諸軍圍之。未拔。而袁尙所置河東太守郭援以衆至。銳甚。諸將議欲釋之去。繇曰。援之來。關中陰與之通。若棄而示弱。所在之民。誰非軍讐。縱吾欲歸。其得至乎。此爲未戰先自敗也。且援好勝。必易吾軍。若渡汾爲營。及其未至。擊之。可大克也。後果輕渡。未半。急擊大破之。斬援降單于。自天子西遷洛陽。人民單盡。繇徙關中民。又招亡叛以充之。數年戶口稍實。操攻關中。得以爲資。操爲魏王。以爲大理。遷相國。子丕篡漢。遷太尉。封爲平陽鄉侯。曹叡初。進封定陵。遷太傅。初。操時議死刑可宮割者。繇請復肉刑。議者以爲非。遂已。至丕欲復。

肉刑。以有軍事復寢。至是繇上疏。請如孝景之令。其當棄市。欲斬右趾者。許之。其黥、劓、宮、刑、左趾者。自如孝文易以髡笞。人年二十至五十。雖斬其足。猶任生育。今天下人少于孝文之世。計其所全。歲三千人。張蒼除肉刑。所殺歲以萬數。臣欲復肉刑。歲生三千人。王朗議以爲繇欲輕減大辟之條。以增益別刑之數。此卽起偃爲豎。化死爲生。然臣以爲五刑之屬。著在科律。自有減死一等之法。不死卽爲減。施行已久。不待遠假斧鑿。於彼肉刑。前世仁者。不忍肉刑之慘酷。是以廢而不用。今復行之。恐非所以宣洪化也。今欲按繇所欲。輕之死刑。使減死之。髡刑嫌其輕者。可倍其居作之歲數。內有以生易死。不貲之恩。外無以別易笞駭耳之聲。議者多與朗同。遂寢。尋卒。子毓嗣。毓字稚叔。機捷談笑有父風。累遷黃門侍郎。時大興宮室。民疲於役。毓諫以爲水旱可俟豐年。又言宜復關內。開荒地。使民肆力於農。事遂施行。曹爽舉衆寇漢中。王師禦之。不得進。毓以書諭止。遂失爽意。出爲魏郡太守。爽死。入爲廷尉。建議君父已沒。臣子得爲理謗。及士爲侯。其妻不得復配嫁。後爲青州刺史。加後將軍。遷徐州卒。弟會字士季。敏慧夙成。及壯。有才藝。而博學精練。名理由是知名。爲中書侍郎。曹髦初。司馬師攻毌丘儉。會典知機密。司馬昭輔政。爲黃門侍郎。封東武亭侯。遷司隸校尉。雖在外司。時政損益。無不兼綜。然恃權害物。嵇康等小小嫌隙。皆致之死。凡昭所以傾曹氏。會謀爲多。炎興元年。昭使率衆與鄧艾犯漢。漢亡。會誣殺艾。尋以謀反誅。會嘗論易無互體。著書二十篇。名曰道論。實刑名家也。有嚴幹者。善春秋公羊。而繇好左氏。謂左氏爲太官。謂公羊爲賣餅家。數與幹辨析長短。繇機捷善持論。而幹呐口。或絀而無以應。繇謂幹曰。公羊竟爲左氏服矣。幹曰。

直故吏爲明使君服耳。公羊高未肯也。

陳羣

陳羣字長文。潁川許昌人。祖寔。父紀。叔謏。皆有盛名。爲兒時。寔常奇之曰。此兒必興吾宗。昭烈臨豫州。辟爲別駕。時陶謙死。徐州迎昭烈。昭烈欲往。羣說曰。袁術尙強。今必與之爭。呂布若襲將軍之後。將軍雖得徐州。事必無成。昭烈不從。遂東與袁術戰。布果襲下邳。遣兵助術。昭烈軍敗。恨不用陳羣言。舉茂才不行。曹操辟爲司空西曹掾。薦廣陵陳矯。丹陽戴乾。操皆用之。除蕭贊令。後以司徒掾舉高第。爲治書侍御史。參丞相軍事。操稱魏王。遷御史中丞。操欲復肉刑。曰。安得通理達於古今者。使平斯事乎。昔陳鴻臚以爲死刑有可加于仁恩者。正謂此也。汝能申其父之說乎。羣曰。臣父紀以爲漢除肉刑。而增加笞。本興仁惻。而死者更衆。所謂名輕而實重者也。名輕則易犯。實重則傷民。書曰。惟敬五刑。以成三德。易著剋。則滅趾之法。所以弼政輔教。懲惡息殺也。若用古刑。使淫者下蠶室。盜者刖其足。則永無淫放穿窬之姦矣。夫三千之屬。雖未可悉復。若斯數者。時之所患。宜先施行。漢律所殺。殊死之罪。仁所不及也。其餘逮死者。可以刑殺。如此。則所刑之與所生。足以相質矣。以笞死之法。易不殺之刑。是重人肢體。而輕人軀命也。時鍾繇與羣議同。王朗及議者。以爲未可行。操善羣言。以有軍事故。寢轉侍中。領丞相東西曹掾。子丕待以交友之禮。嘗歎曰。自吾有回門人。以親代父爲相。封羣昌武亭侯。遷尙書。及篡漢。遷僕射。加侍中。徙尙書令。進封潁鄉侯。丕侵吳。以爲中領軍。還爲鎮軍大將軍。領中護軍。錄尙書事。丕病。羣與曹真。司馬懿等。受遺詔。

輔政。叡初進封潁陰。頃之爲司空。上疏宜崇德布化。惠恤羣庶。曹真請數道犯漢。從斜谷入。羣以爲昔攻張魯。多收豆麥。以益軍糧。魯未下而食猶乏。旣無所因。且斜谷阻險。難以進退。轉運必先鈔截。多畱兵守要。則損戰士。不可不熟慮也。叡從其議。真又請從子午道。羣又陳不便。并言軍事用度之計。叡以羣議下真。真不從。遂行。霖雨積日。羣又以爲宜召真還。從之時。盛夏營宮室。百姓失農時。羣上疏曰。禹承唐虞之盛。猶卑宮室而惡衣服。況今喪亂之後。人民絕少。比文景之世。不過一大郡。且邊境不寧。將士勞苦。若有水旱之患。國之深憂也。宜講武勸農。以待強敵。今舍此而先宮室。懼百姓遂困。將何以應敵。建興十四年卒。祖終太丘長。父大鴻臚。羣官至三公。而德望每不及先人。時以爲公慚卿。卿慚長。子泰字玄伯。仕至尙書右僕射。與司馬師及其弟昭皆友善。昭嘗問沛國武陟曰。玄伯何如其父。陟曰。通雅博暢。能以天下聲教爲己任。不如也。明達簡至。立功立事。則又過之。初羣以吏部不能審天下之士。于是制九品官人之法。令郡國各置中正。州置大中。正皆取本土之人。任朝廷官。德充才盛者爲之。使銓次等級。以爲九品。有言行修著則升之。道義虧闕則降之。吏部憑之以補授百官。後行之寢久。中正或非其人。姦弊日滋。至晉劉毅始陳中正之設有八損。請除。武帝善其言。不能革。

陳矯

陳矯字季弼。廣陵東陽人。太守陳登請爲功曹。郡爲孫權所圍。登使求救於曹操。說操曰。鄙郡雖小。形便之國也。若蒙救援。使爲外藩。則吳人挫謀。未從之國。望風景附。崇德養威。此王業也。操奇矯欲畱之。矯辭。